

فريق التفريغ بموقع الطريق إلى الله

يقدم

برنامج " مجالس القرآن سورة الأعراف "

الدرس الثالث الآيات ١٠ - ١٨

(باللهجة المصرية)



لفضيلة الشيخ: أحمد عبد المنعم

رابط المادة: <https://way2allah.com/khotab-item-127555.htm>

بسم الله، والصلاة والسلام على رسول الله - صلى الله عليه وسلم - نستكمل بإذن الله ما بدأناه في "وقفات مع سورة الأعراف".

كنا توقفنا عند الآية العاشرة عند قوله - سبحانه وتعالى -: **"وَلَقَدْ مَكَّنَّاكُمْ فِي الْأَرْضِ وَجَعَلْنَا لَكُمْ فِيهَا مَعَايِشَ ۗ قَلِيلًا مَّا تَشْكُرُونَ"** الأعراف: ١٠، تكلمنا في المرة الماضية عن ماذا أو كيف يتعامل الناس مع الرُّسُل، ثم أخبرنا الله - عز وجل - أن قليلاً منهم ما يتذكرون، ثم أخبرنا الله - عز وجل - أن كثيراً من القرى أهلكهم الله - عز وجل - لأنهم لم يتذكروا ولم يستجيبوا للرُّسُل، ثم أخبرنا الله - عز وجل - في انتقال إلى مشهد في الآخرة، مشهد في السؤال **"فَلَنَسْأَلَنَّ الَّذِينَ أُرْسِلَ إِلَيْهِمُ"** الأعراف: ٦، ثم رجل يُقْصُّ عليهم بعلم، ثم **"الْوَزْنُ يَوْمَئِذٍ الْحَقُّ"** الأعراف: ٨، ثم أخبرنا الله - عز وجل - في انقسام الناس إلى فريقين على حسب الموازين الشرعية ليست على حسب موازين الناس.

يعني الناس تنقسم، يعني لما تيجي تقسم الناس ممكن في الدنيا تُقسِمَ الناس إلى غني أو فقير، إلى مُتعلّم أو أمّي، إلى وظيفة معينة موظف أو غير موظف، ممكن فيه تقسيمات مختلفة للناس، لكن التقسيمات في الآخرة، فمن خفت موازينه فأولئك في قِسم، ومن ثقلت موازينه - أسأل الله - عز وجل - أن أكون وإياكم منهم -، **"فَمَنْ ثَقَلَتْ مَوَازِينُهُ"** الأعراف: ٨، ثم أخبرنا الله - عز وجل - عمّن خفت موازينه. ثم قال ربنا - سبحانه وتعالى -: **"وَلَقَدْ مَكَّنَّاكُمْ فِي الْأَرْضِ وَجَعَلْنَا لَكُمْ فِيهَا مَعَايِشَ ۗ قَلِيلًا مَّا تَشْكُرُونَ"** الأعراف: ١٠، تكلم المفسرون في علاقة هذه الآية بالآيات السابقة، هل الواو دي واو عطف تعطف على معنى معين؟ ولا بتعطف جملة على جملة؟ أو واو استئناف؟ في واو اسمها واو استئناف بتبتدئ معنى جديد أصلاً.

قال بعضهم في علاقة هذه الآية بالآيات السابقة، أن من أسباب غرور الناس وسقوطهم في الابتلاء وفي الامتحان، أن الله - عز وجل - مكّن لهم في أسباب الدنيا، إن من أسباب إن الناس كثير من الناس لا يشكر ولا يتذكر وأنه يسقط في ابتلاء إجابة الرُّسُل وكيف يتعامل مع الآيات، زي ما قلنا إن ده من محاور سورة الأعراف، كثير من الناس يسقط لماذا؟ بسبب أنه مفتون بفتنة التمكين في الدنيا، الله - عز وجل - مكّن له في الأرض، مكّن له؛ جعل له القدرة على التحكّم في أسباب الأرض، وستنكلم في معنى التمكين، إحنا الآن نتكلم في العلاقة بين هذه الآية والآيات السابقة.

فقال بعضهم: إن هذه إشارة إلى أن كثير من الفِطْر التي انخرفت عن منهج الله - سبحانه وتعالى - كانت بسبب هذه الدنيا، بسبب هذه النعمة، بدلاً من أن يشكروا هذه النعمة، كانت هذه النعمة وكان هذا التمكين فتنة لهم. وقال بعض المفسرين: علاقة الآيات "كما أن الله - عز وجل - أنذرهم وهددهم، فكذلك يذكر لهم النعم، فهكذا القرآن مثاني يأتي بالترغيب وبالتهريب، فأخبرهم الله - عز وجل - أنه كما أنه أهلك بعض الأمم السابقة، فكذلك أنعم علينا ومكّن لنا في الأرض، وأعطانا من النعم - سبحانه وتعالى -.

الله - سبحانه وتعالى - على شيء قدير

وخاصةً بعض المفسرين لو قال أن الخطاب في هذه الآية كان خاص بقريش "وَلَقَدْ مَكَّنَّاكُمْ فِي الْأَرْضِ" الأعراف: ١٠، وأنَّ المَعْنَى بكلمة الأرض هي مكة، وإن ده خطاب خاص لقريش ومكة، فالمفسرون قالوا: كما أن الله - عز وجل - هدّد وأنذر أهل مكة بإهلاك الأمم السابقة، كذلك ذكّرهم بنعمة تمكينهم في الأرض التي فيها البيت، وكيف أن الله - عز وجل - جعل هذه الأرض يُجَبِّي إليها ثمرات كل شيء، وهي أصلاً أرض غير صالحة للزراعة، كيف أن الله - عز وجل - سهّل لهم مجيء الرزق إليهم بدون تعب.

وكيف أن الله - عز وجل - أجبر كوناً القوافل في سيرها أن تلتجئ إلى مكة، فبعض المفسرين قال: إن علاقة الآية دي بالآيات السابقة، إن ده سبب من أهم أسباب الفتنة هو التمكّن الدنيا، فقال بعضهم إن ده تنوع بين الترغيب والترهيب، وكما أن الله - عز وجل - ذكر التهيب، ها هو هنا يذكر النعم على أهل الإيمان.

التمكين في الأرض

"وَلَقَدْ مَكَّنَّاكُمْ فِي الْأَرْضِ وَجَعَلْنَا لَكُمْ فِيهَا مَعَايِشَ" الأعراف: ١٠

قيل: التمكين في الأرض ليس فقط كتمكين الله - عز وجل - ذي القرنين "إِنَّا مَكَّنَّا لَهُ فِي الْأَرْضِ" الكهف: ٨٤ قال بعض المفسرين ده تمكين مختلف عن ده، لأن هناك التمكين تسخير وإعطاء لذي القرنين قوة حقيقية يتحكم فيها في هذه الأسباب.

أما التمكين هنا أن الله - عز وجل - أعطى للإنسان الآلات والأدوات التي لو استطاع أن يستعملها حقاً لوصل إلى التمكين في الأرض، بمعنى: إن ربنا - سبحانه وتعالى - خلق عقل الإنسان قادر على الوصول بكثرة التجارب والتعاون والتشاور، عقل الإنسان قادر على أن يُوفَّق إلى السيطرة على الأرض، والله - عز وجل - جعل هذه الأرض أيضاً قابلة إن الإنسان يُمكن فيها ليه؟ الله - عز وجل - جعل هذه الأرض قائمة على أسباب ثابتة، الله - عز وجل - جعل من سنته - سبحانه وتعالى - أن سنن ربنا في الكون ثابتة لا تتغير، يعني الحديد مثلاً بينصهر عند درجة حرارة معينة، الماء بيتبخر عند درجة حرارة معينة، خواص معينة للرياح، خواص معينة للماء، خواص معينة للأرض، للصخور.

هذه السنن ثابتة فإذا اكتشفها الإنسان وفكر كيف يتعامل معها، وكيف يستغل الرياح، وكيف يستغل الأنهار، وكيف يستغل دوران الشمس، وتقلب الليل والنهار، إذا استطاع الإنسان استغلال هذه السنن الثابتة، هو يُمكن له في الأرض، وكأن هذه النعم كلها سُخرت له، هذا التمكين يجعل الإنسان بعد فترة يظن أنه لا يحتاج إلى إله، "وَلَقَدْ مَكَّنَّاكُمْ فِي الْأَرْضِ وَجَعَلْنَا لَكُمْ فِيهَا مَعَايِشَ" الأعراف: ١٠، حينما يأتيه رزقه ويطمئن به وتطمئن عيشته ويشعر بالتمكين، في هذه اللحظات غالبًا ما يتكلم الإنسان المتكبر الجاحد أنه لا يحتاج إلى إله، لأ خلاص أنا مش محتاج ربنا في حاجة، أنا عرفت أسيطر على الأرض، "وَوَظَّنَّ أَهْلُهَا أَنَّهُمْ قَادِرُونَ عَلَيْهَا" يونس: ٢٤.

وهكذا الملاحظة اليوم، يظنون أنهم باكتشافهم الأسباب التي وضعها ربنا -سبحانه وتعالى-، هذه الأسباب لم تأت عبثًا من الذي ضبط هذا الكون؟ لذلك أهل العلم يقولوا أن من أدلة وجود الله، بل من أدلة علم الله وقدرته -سبحانه وتعالى- المعيار والضبط الدقيق للكون، المعيار والضبط الدقيق للكون، اللي بيسموه **fine tuning**، إن إزاي كل حاجة معمولة بدقة غير متناهية، دقة رهيبه، دقة يعني مهما حاول الإنسان أن يكتشف هذه الدقة، أرقام صغيرة جدًا جدًا، لو تغيرت لفسد الكون.

بل حتى بعض غير المؤمنين، وأظن هو لا أدري ألف كتاب اسمه مجرد ٦ أرقام، اسمه **just 6 numbers**، مجرد ٦ أرقام وبيتكلم إزاي أن الكون فيه أرقام، مجرد رقم ١ بعد الفصلة من ٦ أرقام لو تغير الكون يفسد، وقال: أن هذا الكون قائم على معيات دقيقة جدًا، ثم هذا الشخص العجيب، يسأل في آخر الكتاب من الذي ضبط هذا المعيار، ثم ظل يبحث ولم يهتد إلى أنه الله -سبحانه وتعالى-، أمر عجيب فعلاً، إن هما يكتشفوا هذه الأسباب ثم يظنون أن، هما لم يفعلوا هذه الأسباب، مش هما اللي ضبطوا الكون، هم يكتشفون فقط، ثم بعد ذلك يقولون نحن لا نحتاج إلى إله، فهذا التمكين في الأرض من أهم أسباب فتنة الناس عن الدين، إن كل ما الإنسان بيزداد تمكين في الأرض، كل ما الإنسان بيزداد، الطاغية، الجاحد الذي لا يذكر النعم.

ولذلك من المعاني المتكررة كثيرًا جدًا في سورة الأعراف الشكر، من المعاني المتكررة، احنا قلنا واحنا ماشيين مع بعض كده، هنعاول نستخلص الحاور الأساسية اللي بتتكرر معنا.

قلنا أن من أكثر الكلمات اللي ذُكرت في سورة الأعراف إيه قبل كده؟ آيات، قلنا الآيات، لأن كلمة آيات أكثر سورة تكررت فيها سورة الأعراف، خلاص، **والتعامل الخاطيء مع الآيات**، كذبوا بآياتنا، ظلموا بآياتنا، التعامل الخاطيء مع الآيات.

قليلًا ما تشكرون

فأيضًا من المعاني التي تكررت في السورة قضية الشكر، حتى الشيطان سيُخبر بذلك، سيبحث عن قضية الشكر، فهذا التمكين المفروض أن يقابله شكر لأنها نعمة من عند الله، لا يقابله جحود فيقول الجاحد أنا لا أحتاج إلى إله، "وَلَقَدْ

مَكَّنَّاكُمْ فِي الْأَرْضِ وَجَعَلْنَا لَكُمْ فِيهَا مَعَايِشَ، الله -عز وجل- هو الذي قَدَّرَ هذه الأرزاق، هذه الأرزاق لم تأت عبثًا، الله -عز وجل- خلق المعدة تحتاج إلى أنواع معينة من الطعام من البروتينات والدهون والكريبوهيدرات، الله -عز وجل- جعل هذه الأشياء موجودة في الطبيعة، وإلا من الذي جعل هذه الأشياء متناسبة مع المعدة؟ كان ممكن إن كل الطعام اللي موجود في الكون المعدة لا تستطيع أن تهضمه فلن يستفيد منه الإنسان. تخيل لو كل الأطعمة الموجودة في الكون، مكونة مثلاً ناشئة من الصخور مثلاً، أو الأسمت والحديد، لا يستطيع أن يطعمها الإنسان، من الذي جعل هذه المعدة تستطيع أن تأكل هذا الطعام؟ من الذي جعل هذه الأرض الطينية السوداء تُخْرِج هذه الألوان من الأطعمة؟ من الذي قَدَّرَ هذه المعاييش؟ من الذي قَدَّرَ دورة المياه في الأرض حتى لا ينفد، وأن الإنسان يحتاج إلى الماء، من الذي قَدَّرَ كل هذا؟ -سبحانه وتعالى- فالذي مَكَّنَ لكم وجعل لكم فيها معاييش لكن للأسف كما حُتِمت هذه الآية **"قَلِيلًا مَّا تَشْكُرُونَ"**، أن شكر هذه النعم قليل.

طول فترة النعمة والاختبار تجعل الإنسان ينسى

لأن الإنسان مع طول النعمة وأيضًا طول فترة الاختبار ينسى الإنسان، وده أمر مهم جدًا إن أحيانًا الإنسان لما يقع فترة طويلة بدون محاسبة، يعني هو قاعد في لجنة الامتحان لكن بدون محاسبة ينسى، يعني تخيل مثلاً لو واحد دخل كلية وقالوا له الامتحان بتاعك مش بعد كل ترم ولا آخر كل سنة، امتحانك بعد ما تخلص الأربع سنين هنعملك الامتحان، ده ببسّه عليه عملية النسيان، طبعًا لو كده أنت هتعيش ٣ سنين و ١١ شهر براحتك وتيجي آخر شهر تدور على الورق، فطول فترة الامتحان بدون محاسبة بتجعل الإنسان ينسى، يقول لك طب ما خلاص بقى.

فكذلك الدنيا إن المحاسبة مؤجلة، لكن أنت الآن في فترة الامتحان. لما بيعدي على الإنسان فترة طويلة بدون بلاء، بدون عقوبة، هذه الأشياء بتجعل الإنسان ينسى ويصل إلى مرحلة من الاسترخاء والاستدراج -والعياذ بالله-، فقال ربنا -سبحانه وتعالى- **"قَلِيلًا مَّا تَشْكُرُونَ"**.

نعمة الإيجاد

ثم قال ربنا -سبحانه وتعالى- ليخبرنا بنعمةٍ أخرى، ونعمةٍ أهم وأعلى، وهي نعمة الإيجاد أصلًا، يعني إذا كانت هذه النعمة الإنسان بياكل ويطعم في الدنيا، من الذي أوجدكم؟ **"وَلَقَدْ خَلَقْنَاكُمْ ثُمَّ صَوَّرْنَاكُمْ"** الأعراف: ١١، خلقكم الله -عز وجل- وأوجدكم بعد أن لم يكن الإنسان شيئًا مذكورًا، ثم هو خلقكم -سبحانه وتعالى-، **"ثُمَّ صَوَّرْنَاكُمْ"**، نعمة التصوير، ثم دي أحيانًا ببسموها التراخي الرُتبي، يعني نعمة أعلى كمان، بنلتقي في رتبة أعلى، يعني ثم مش بس أحيانًا بتفيد العطف، لا أحيانًا ثم بتفيد التراخي الرُتبي، يعني إيه كلمة التراخي الرُتبي دي؟ يعني إن ما يُذكر بعد ثم أعلى مرتبة مما قبل ثم، ممكن يكون أعلى في النعمة، وممكن يكون أعلى في الجحود.

زي ما في أول الأنعام " الْحَمْدُ لِلَّهِ الَّذِي خَلَقَ السَّمَاوَاتِ وَالْأَرْضَ وَجَعَلَ الظُّلُمَاتِ وَالنُّورَ ۗ ثُمَّ الَّذِينَ كَفَرُوا بِرَبِّهِمْ يَعْدِلُونَ " الأنعام: ١ ، فرق في الرتبة رهيب بين الخلق والإيجاد، ثم يكفرون النعمة، كيف نزلوا وانحطوا إلى هذه المرتبة، فالتراخي الرتبي إما للعلو أو إما إلى السفول، على حسب السياق، فهنا، "وَلَقَدْ خَلَقْنَاكُمْ ثُمَّ صَوَّرْنَاكُمْ"، طب ما فيه مخلوقات كثيرة لكن ليست كهيئة الإنسان، الذي كَرَّمَهُ اللهُ بل وشَرَّفَهُ اللهُ -عز وجل-، لم يخلق الله -عز وجل- الإنسان يزحف على بطنه، ولم يَخْلُقِ اللهُ -عز وجل- الإنسان إذا أراد أن يَطْعَمَ يَضَعُ فَمَهُ فِي الْأَرْضِ، لكن الله -عز وجل- كَرَّمَهُ هَذَا الْإِنْسَانَ، وجعله منتصب القامة، ثم جعله لا يسجد إلا له -سبحانه وتعالى-.

الإشكالية في هذه الآية

كَرَّمَهُ هَذَا الْإِنْسَانَ "وَلَقَدْ خَلَقْنَاكُمْ ثُمَّ صَوَّرْنَاكُمْ ثُمَّ قُلْنَا لِلْمَلَائِكَةِ اسْجُدُوا لِآدَمَ"، هذه الآية فيها إشكال طويل بين المفسرين أنا هحاول أذكره مقتضب، عشان أنا عارف أن أغلبكم عايز يقرأ في التفاسير، وعايز يروح ينهمك في التفاسير، فبقول له غالبًا إن فيه بعض الحاجات هتقابله، هنا فيه إشكالية لو قلنا أن كلمة، "ثُمَّ قُلْنَا لِلْمَلَائِكَةِ اسْجُدُوا لِآدَمَ"، إزاي ربنا يخاطب البشر يقول: "خَلَقْنَاكُمْ ثُمَّ صَوَّرْنَاكُمْ ثُمَّ قُلْنَا لِلْمَلَائِكَةِ اسْجُدُوا لِآدَمَ"، هو احنا خُلِقْنَا الْأَوَّلَ وَصَوَّرْنَا وَبَعْدَ كَدِّهِ رَبَّنَا قَالَ لِلْمَلَائِكَةِ اسْجُدُوا لِآدَمَ الْأَوَّلَ وَبَعْدَ كَدِّهِ، بعد فترة من الزمان ربنا خلقنا وصورنا، إيه اللي حصل في الزمان؟ ترتيب الزمان إيه اللي حصل؟

ربنا خلق آدم وبعدين قال للملايكة تسجد لآدم، أمر الملايكة بالسجود لآدم، ثم خلقنا وصورنا -سبحانه وتعالى-، فقالوا إن ثم دي لو بتفيد العطف الزمني، يبقى هنا فيه إشكالية، فحاولوا هنا احنا دايماً قلنا أن التذكير أنك بتلتقط إشكالية ثم يختلفوا في الحل، يُبَدِعُوا فِي إِيجَادِ الْحُلُولِ، قال بعضهم: أن خلقناكم وصورناكم هذا خطاب المقصود به آدم، ثم خُوطِبَ بِالْجَمْعِ تَكْرِيماً لَهُ، مش المقصود به بقية البشر، وأن بقية البشر يدخلون فيه تبعًا، إنما الخطاب في الأصالة لآدم، فكأن معنى الآية: ولقد خلق الله -عز وجل- آدم ثم صوره ثم قال للملايكة اسجدوا له، طب ليه جه الخطاب بالجمع؟ تكريماً لآدم.

وقال بعضهم: لا، المقصود هنا بالخلق هو التصوير إيجاد الذرية في صلب أبينا آدم، وأنا قدَّرَ اللهُ -عز وجل- بداية خلق كل إنسان وضع أصل هذه المادة في صلب أبينا آدم، "خَلَقْنَاكُمْ ثُمَّ صَوَّرْنَاكُمْ"، وهذا حدث مع بداية الخلق ثم قال للملائكة اسجدوا لآدم، فهنا الترتيب الزمني متسق، وقالوا طب إيه الدليل على ده؟ ما الدليل على هذا؟ قالوا الدليل هيبقى أن الله -عز وجل- مسح على ظهر آدم فأخرج كل الذرية من ظهر آدم، فهذا دليل أن أصل المادة موجود.

وبعض الأبحاث اللي اتعملت في الإعجاز العلمي في قضية الذي إن إيه تثبت وبيختاروا القول ده اللي بيتكلموا بالإعجاز العلمي، وإن قضية إن أصل الإنسان المادة بتاعته اللي هي مادة الذي إن إيه، إن هي اللي بيتم توارثها من لدن آدم -عليه السلام-، فده قول.

قول ثاني، إن الموضوع ملوش علاقة أصلاً بالترتيب الزمني، وإن كلمة تُم، أي أن الله الذي خلقكم هذه نعمة، "تُم صَوْرَتَاكُمْ"، هذه نعمة أعلى، "تُم قُلْنَا لِلْمَلَائِكَةِ"، هذه نعمة أعلى وأعلى، القضية مش في ترتيب زمني، القضية في ترتيب رتب النعم، لأن ممكن إنسان يُخْلَق ثم يَصَوَّر ثم لا يُكْرَم، فقالوا التكريم بإسجاد الملائكة لآدم هذه أعلى نعمة أخذها الإنسان،

طيب لو قلنا إن فعلاً أن هذه أعلى نعمة أخذها الإنسان. فالعلماء اتكلموا: ما هي النعمة الخاصة بأبينا آدم التي استوجبت إسجاد الملائكة له؟ تاني؛ ما هي النعمة أو الفضيلة التي حاز أو أعطها الله -عز وجل- لآدم جعلت الملائكة يسجدون له، إيه هي النعمة دي؟ يعني إيه الفضيلة اللي عند سيدنا آدم خلت الملائكة يسجدوا له؟ إيه؟ العلم، ما هو مكنش لسه عبد، نفخ الروح أنها من عند الله -سبحانه وتعالى-، لأن في آيات "وَنَفَخْتُ فِيهِ مِنْ رُوحِي فَقَعُوا لَهُ سَاجِدِينَ" الحجر: ٢٩، فقالوا السجود هنا مترتب على نفخ الروح.

سورة البقرة، ربنا -سبحانه وتعالى- ذكر قصة الإسجاد بعد قصة التعليم، لكن العلماء اختلفوا وهل التعليم حصل الأول وبعدين السجود، ولا السجود حصل الأول وبعدين التعليم، فيه خلاف بين أهل العلم في سورة البقرة، فمجموع القولين نفخ الروح والعلم، نفخ الروح أي أنها روح من عند الله -عز وجل-، وأن آدم ليس مجرد طين، إنما فيه روح من الملك -سبحانه وتعالى-، هذه الروح هي التي ترفع الإنسان.

فإذا كانت هذه النعمة، نعمة نفخ الروح هي أعلى نعمة عند الإنسان كيف يُعرض الإنسان عنها ويلتصق بالأرض؟ كيف يختار الدنيا ويترك الطاعة؟ كيف يجحد ما جاء من عند الله وهو الوحي ويختار المناهج الأرضية، هو يكفر بأعظم نعمة، فإذا اختار الإنسان الأرض ولصق إلى الأرض، وأخلد إلى الأرض كما معنا في آخر سورة الأعراف، آتيناه آية، "وَلَكِنَّهُ أَخْلَدَ إِلَى الْأَرْضِ" الأعراف: ١٧٦، هو يكفر ويجحد بأعظم نعمة أعطها الله -عز وجل- للإنسان، نعمة نفخ الروح من عند الله -سبحانه وتعالى-.

والنعمة الأخرى نعمة العلم، الذي لا يتعلم ولا سيِّما الوحي؛ هو يجحد أعظم نعمة، نعمة أن الإنسان قابل للتعلُّم، الإنسان قابل أنه يتعلم، هذه نعمة وفضيلة أعطها الله -عز وجل- للإنسان، يبقى اتكلمنا عن الإشكال اللي في تُم، واتكلمنا إزاي العلماء حاولوا يحلوا هذه الإشكالية.

هل إبليس كان من الملائكة؟

"تُم قُلْنَا لِلْمَلَائِكَةِ اسْجُدُوا لِآدَمَ فَسَجَدُوا إِلَّا إِبْلِيسَ لَمْ يَكُنْ مِنَ السَّاجِدِينَ"، معلى احنا هنا نتكلم بسرعة، يقابلنا إشكاليات بنحاول نذكر آراء المفسرين في حلها، "فَسَجَدُوا إِلَّا إِبْلِيسَ لَمْ يَكُنْ مِنَ السَّاجِدِينَ"، فين الإشكال اللي هنا في الآية دي؟ إن ربنا يقول: "تُم قُلْنَا لِلْمَلَائِكَةِ اسْجُدُوا لِآدَمَ"، ربنا يقول: "فَسَجَدُوا"، الواو واو الجماعة

دي بتعود على مين؟ على الملائكة، " فَسَجِدُوا"، يعني لو شلنا واو الجماعة الضمير وحبينا نخط الإسم الظاهر، هنقول: فسجد الملائكة.

رينا بيقول: " فَسَجِدُوا إِلَّا إِبْلِيسَ لَمْ يَكُنْ مِنَ السَّاجِدِينَ" إزاي نحل الإشكال ده؟ الشيخ باسل أهو بيقول إبليس مش ملك أصلاً، طب لما هو إبليس مش ملك أصلاً إزاي جه بعد الاستثناء؟ لو قلنا إن إبليس مش ملك إزاي جه بعد الاستثناء؟ مش المفروض ما بعد الاستثناء من جنس ما قبل الاستثناء، يعني أنا لما أقول مثلاً: أكلتُ الخروفَ إلا الذراع، المفروض إن الذراع ده من جنس ده معايا؟ أو مثلاً: ضربتُ الطُّلابَ إلا طالب، من جنس ده صح؟ يبقى ده اسمه استثناء، طب إزاي إبليس، لو قلنا إن إبليس مش من الملائكة إزاي إبليس يبجي بعد الاستثناء؟ يبقى دي إشكالية، تعالوا نشوف العلماء حلوها إزاي.

بعض العلماء، ومش عاوزك تستغرب، قال إبليس من الملائكة، عشان متصدمش بس لما تيجي تقرأ في التفاسير، وهنا بيقابلنا إشكالية إن بعض الناس لما بيقابل الأقوال اللي زي دي بيفزع، زي ما يكون مثلاً كان بيطوف حوالين مكان غلط زي ما يكون فيه أصل من الدين هُدم، وهو الموضوع بسيط عادي، إنت ضرك إيه دلوقتي لما عرفت إن بعض العلماء قالوا إن هو كان الملائكة ثم فسق عن أمر ربه طرده الله - عز وجل -، يعني إيه اللي ممكن يعمل أزمة نفسية في حاجة زي كده؟ فأحياناً بعض الناس بيسمع بعض الأقوال فيُصدَم.

أنا عايز أقول لك إن الصدمة الأكبر إن بعض الناس نسبوا القول ده لجمهور المفسرين، وده اختيار كثير من أئمة التفسير، زي الإمام الطبري، وأظن ابن عطية، وغيرهم من المفسرين، وإن كان في ظني ليس هذا هو الراجح والله أعلى وأعلم - لأن فيه أدلة ثانية أقوى.

طيب اللي قالوا إبليس من الملائكة لازم يحلوا إشكالية، واللي قالوا إبليس ليس من الملائكة لازم يحلوا إشكالية الاستثناء، يبقى كل واحد هنا هيختار قول لازم يبقى مُطَرَّد مع نفسه، اللي هيختار إن إبليس من الملائكة لازم هيقلبوا آية مُشكَّلة صريحة في القرآن اللي هي إيه؟ آية الكهف هي دي أصرح آية في القرآن "إِلَّا إِبْلِيسَ كَانَ مِنَ الْجِنِّ فَفَسَقَ" الكهف: ٥٠، الزيادة دي مش موجودة غير في آية الكهف "كَانَ مِنَ الْجِنِّ"، بتؤكد أن الكينونة من الجن، فالتانيين قالوا ما احنا اللي خلانا نقول إنه من الملائكة إن الأمر صدر للملائكة. فإما يأولوا صدور الأمر للملائكة إن إبليس مكنش معاهم لكن تلقى الأمر فقط، أو يأولوا كلمة "كَانَ مِنَ الْجِنِّ".

اللي قال إن إبليس من الملائكة قال: إن الجن هنا معناه: كل مستتر عن العين، كل مستتر عن العين يسمى جن، مش المقصود بيه الجن اللي هما الجن الشياطين، فكل مستتر عن العين يسمى جن، جابوا الكلام ده منين؟ قال رينا -

سبحانه وتعالى:- **"وَجَعَلُوا بَيْنَهُ وَبَيْنَ الْجَنَّةِ نَسَبًا"** الصافات: ١٥٨، سورة الصافات كثير من السلف قال: الجن هنا الملائكة، لأن فعلاً قريش كانت بتقول الملائكة بنات الله -تعالى الله عما يقولون-.

طب ردوا إزاي على حديث صحيح مسلم **"أن الله -عز وجل- خلق الملائكة من نور، وخلق الشياطين أو الجن من مارج من نار، وخلق آدم مما وُصِفَ لكم"**^١، اللي هو من الطين يعني، قالوا: إن ده فرع من الملائكة اللي هو الجن، فصيل، فصيل من الملائكة اللي هي الجن، كان عندها قضية الاختيار زي إبليس، لكن الملائكة عامة، وبعضهم قال: لأ ده كان من الملائكة فعلاً لكنه لما عصى طرده الله -عز وجل- ويفعل الله -عز وجل- ما يشاء، خلاص؟

القول الثاني: إن إبليس ليس من الملائكة، وإن هو رفعه الله -عز وجل- معهم لكنه ليس منهم، رفعه لعبادته وإن إبليس مخلوق من نار كما هو في الصحيح، صحيح مسلم، **"خُلِقَ مِنْ مَارِجٍ مِنْ نَارٍ"** وقال ربُّنا: **"كَانَ مِنَ الْجِنِّ فَفَسَقَ عَنْ أَمْرِ رَبِّهِ"** الكهف: ٥٠، وإن إبليس له حرية الاختيار في القرار، ليس كالملائكة **"لَا يَعْصُونَ اللَّهَ مَا أَمَرَهُمْ"** التحريم: ٦، إبليس زي آدم، أنه أعطاه الله -عز وجل- أحد معاني الأمانة؛ القدرة على الاختيار الخير أو الشر **"فَأَلْهَمَهَا فُجُورَهَا وَتَقْوَاهَا * قَدْ أَفْلَحَ مَنْ زَكَّاهَا * وَقَدْ خَابَ مَنْ دَسَّاهَا"** الشمس ٨: ١٠، لأن الإنسان **"إِمَّا شَاكِرًا وَإِمَّا كَفُورًا"** الإنسان: ٣، هذا الاختيار وهذه الأمانة التي كانت للبشر أيضاً كانت عند إبليس، ولكن إبليس اختار المعصية -والعبادُ بالله- فمُسِخَ وطُعِعَ على قلبه.

إشكالية من يقولون أن إبليس من الجن

زي ما هنتكلم على كلمة **"إِنَّكَ مِنَ الصَّاغِرِينَ"**، وكلام العلماء معاها، ما حدث لإبليس حينما قال الله له: **"إِنَّكَ مِنَ الصَّاغِرِينَ"** الأعراف: ١٣،

فاللي قالوا إبليس من الجن وده اللي أنا شايفه، وده اختيار الإمام ابن كثير وكثير من أئمة السنة المتأخرين وده أوفق -والله أعلى وأعلم-، قالوا: أمال "إلا" هنا معناها إيه بقى؟ هنا هيقابلهم اللي هيقول إبليس من الجن هيقابلهم إشكاليتين:

الإشكالية الأولى: كيف صدر الأمر له؟

الإشكالية الثانية: إزاي جه في الاستثناء؟ الإشكالية الأولى قالوا: حلها أنه كان متعبداً ورفع الله -عز وجل- مع الملائكة، فصدر له الأمر مع الملائكة، لكن طب ليه ربنا مقالش: قلنا للملائكة ولإبليس اسجدوا، قال دا فيه حاجة اسمها التغليب، حاجة في اللغة اسمها إيه التغليب، إن لما يبقى في رجال مثلاً رجال ونساء وإنت بتمر عليهم بتقول: السلام عليكم، مش لازم تقول السلام عليكم وعليكن، لأ من باب التغليب بتغلب الذكور، مش لازم تقول عليكم وعليكن لا من باب التغليب، فهنا من باب التغليب، ودايمًا بتغلب غالبًا الأفضل أو المذكر على حسب قواعد معينة

^١ "خُلِقَتِ الْمَلَائِكَةُ مِنْ نُورٍ، وَخُلِقَ الْجَانُّ مِنْ مَارِجٍ مِنْ نَارٍ، وَخُلِقَ آدَمُ مِمَّا وُصِفَ لَكُمْ." صحيح مسلم

في اللغة، فهنا غُلِبَ الملائكة لأهم أفضل من إبليس، "وَإِذْ قُلْنَا لِلْمَلَائِكَةِ اسْجُدُوا لِآدَمَ" البقرة: ٣٤، جاوبوا على الإشكال الأولاني.

الاستثناء المنقطع والمتصل

طب الإشكالية الثانية: اللي بعد الاستثناء؟ فيه وده معروف في اللغة، خدوا القاعدة دي: " إذا كان ما بعد الاستثناء ليس من جنس ما قبل الاستثناء، يعني إذا كان ما بعد إلا ليس من جنس ما قبل إلا، بتيجي بمعنى لكن، بيسموه استثناء منقطع، لو ما بعد إلا من جنس ما قبل إلا يبقى اسمه استثناء متصل، يعني لما أقول: أكلتُ الفاكهة إلا العصير معنى كلامي: أكلت كل حاجة لكن العصير مقدرتش أكمله، يعني العصير مش من جنس الفاكهة، وله أمثلة كثير في اللغة، إن لو ما بعد إلا ليس من جنس ما قبل إلا بيجي بمعنى إيه؟ لكن. يبقى هيبقى معنى الآية إيه؟ "فَسَجِدُوا إِلَّا إِبْلِيسَ" الأعراف: ١١ يبقى معنى الآية إيه؟ فسجد الملائكة ولكن إبليس لم يسجد، مش معناها إن إبليس من الملائكة.

يبقى استثناء منقطع، عشان ده هيقابلك لما تيجي تقرأ التفاسير هيقول لك الاستثناء ده استثناء منقطع، بمعنى إيه الاستثناء المنقطع؟ عشان تريح نفسك، بمعنى إيه؟ بمعنى لكن، لو ما بعد إلا ليس من جنس ما قبل إلا مش منه خالص ولا من تفاصيله ولا من الشجرة بتاعته أو فروعه، يبقى هو إيه، لذلك بيقول لك حتى مثل مشهور، هو مثل فَجْ يُضْرَبُ أحياناً في كتب اللغة عشان يوضح أد إيه، بيقول لك: جاء الطلابُ إلا حماراً، هو عايز يقول لك إن الحمار مش من الطلاب، ليس من جنسهم، يعني: ولكن لم يأتِ ولا حمار جاء كل الطلاب ولم يأتِ أي حيوانات، ده الغرض منه هو مش جملة واقعية، الغرض منه يوضح لك إمتي ازاي ده بيجي بعد إلا، ده مقبول في لغة العرب، يبقى بيسموه استثناء إيه؟ استثناء منقطع.

قرار إبليس بالمعصية من قبل خلق آدم - عليه السلام -

فَسَجِدُوا إِلَّا إِبْلِيسَ لَمْ يَكُنْ مِنَ السَّاجِدِينَ" الأعراف: ١١، كلمة "لَمْ يَكُنْ مِنَ السَّاجِدِينَ"، بعض العلماء قال ليه مقالش "لم يسجد" وقال: "لَمْ يَكُنْ مِنَ السَّاجِدِينَ" نفي الكون، كان ده فعل منفي، نفي الكون كأن في طبيعته كان مقرر من الأول، من لحظة خلق آدم، إن أي أمر هيكون فيه تفضيل لهذا المخلوق عليه لن ينفذه، من أول لحظة وإبليس مقرر حسد هذا المخلوق، كما أخبر النبي -صلى الله عليه وسلم- إن "أول لما صور الله -عز وجل- آدم قبل أن ينفخ فيه الروح جعل إبليس يطيف به"، لسه هو عبارة عن تمثال طيني في الجنة، لم يُنفخ فيه الروح بعد "جَعَلَ إِبْلِيسُ يَطِيفُ بِهِ"٢، قعد يدرسه. وفي رواية خارج الصحيح في الآثار وبعضها في الإسرائيليات قال: "لشيء ما خلقت، ولئن سَلَطْتُ عَلَيْكَ لِأَهْلِكَ"، هو من الأول مقرر إن أنا مش هبقى مع دول، أي حاجة فيها تفضيل لهذا المخلوق عليّ لن أنفذه "لَمْ يَكُنْ مِنَ السَّاجِدِينَ" الأعراف: ١١.

٢ لَمَّا صَوَّرَ اللَّهُ آدَمَ فِي الْجَنَّةِ تَرَكَهُ مَا شَاءَ اللَّهُ أَنْ يَتَّكِفَهُ، فَجَعَلَ إِبْلِيسَ يَطِيفُ بِهِ، يُنظَرُ مَا هُوَ، فَلَمَّا رَأَى أَجُوفَ عَرَفَ أَنَّهُ لَخَلْقٌ خَلْقًا لَا يَتَمَالَكُ" صحيح مسلم

وقيل كلمة "لَمْ يَكُنْ مِنَ السَّاجِدِينَ"، تفيد جمع الساجدين تفيد: إنه مكنش له عذر الطلب مكنش له لوحده، يعني مكنش حاجة ثقيلة على نفسه، طب ما يخليه مع بقية الملائكة، أتكون معهم حينما تُرْفَع ولا تكون معهم حينما يسجدوا؟ طب ما تخليك معاهم "لَمْ يَكُنْ مِنَ السَّاجِدِينَ"، من رحمة المَلِك - سبحانه وتعالى - هنا أنه لم يُؤَاخِذْهُ وَيُعَاجِلْهُ بالعقوبة، بل سأله: "قَالَ مَا مَنَعَكَ أَلَّا تَسْجُدَ إِذْ أَمَرْتُكَ" الأعراف: ١٢، هنا في إشارة ودلالة أن الله - عز وجل - لا يُهْلِكُ قَوْمًا إِلَّا بَعْدَ أَنْ يُنذِرَهُمْ وَيَسْأَلُهُمْ وَيَعَاتِبُهُمْ وَيُرْسِلُ إِلَيْهِمْ رَسُولًا، "وَمَا كُنَّا مُعَذِّبِينَ حَتَّىٰ نَبْعَثَ رَسُولًا" الإسراء:

.١٥

كل مشهد من قصص القرآن مناسب لموضوع السورة

"قَالَ مَا مَنَعَكَ أَلَّا تَسْجُدَ إِذْ أَمَرْتُكَ"، سأله الله - عز وجل - . هنا فيه نقطة: سورة الأعراف هنجِد إن كل سورة نقص علينا قصة آدم وخلق آدم بتلتقط لقطات مختلفة، وده في قصص القرآن عامَّةً، تجد قصة سيدنا موسى بتجيب مشاهد مختلفة في سور متنوعة، يعني موسى والخضر مجتث غير في الكهف، السامري مجتث غير في طه، قصة موسى مع فرعون جت متفرقة في سور كثير، كل سورة كانت بتذكر لنا مشهد معين، طب ليه الاختلاف ده؟ كل مشهد من قصص القرآن مناسب لموضوع السورة، ثاني؛ القاعدة دي مهمة جدًا: كل مشهد من قصص القرآن مناسب لموضوع السورة. اتكلمنا عن ده في سورة الأنعام لما قلنا إن قصة سيدنا إبراهيم جت في القرآن في أكثر من موطن، قصة رؤية النجوم والكواكب سواء كان ناظر أو مُناظر لم تأتِ إلا في الأنعام بيِّنًا لماذا، يبقى انتقاء بعض المواطن من قصة واختصاص بها سورة معينة ده مناسب لموضوع السورة.

بداية الخلق وتعليم آدم زي ما موجود في البقرة، لأن الغرض من قصة البقرة فضل آيينا آدم لاستخلافه، هناك بداية الاستخلاف لأن الغرض من سورة البقرة بيان كيف تعامل بنو إسرائيل مع استخلافه، فربنا جابلنا في سورة البقرة القصة من الأول، الغرض في الأعراف مش كده، الغرض الأساسي في الأعراف: التعامل الخاطيء مع أوامر الله، والتحذير من الشيطان الذي يدفعنا لعدم تنفيذ أمر الله، ده من الأغراض الأساسية زي ما اتكلمنا كيف تعامل الأقوام مع الرُّسُل.

يعني في الأنعام كيف تعاملوا مع الرَّبِّ، في الأعراف كيف تعاملوا مع الرسالة مع الأوامر، واضح الفرق؟ ففي الأعراف نجد إن الخلق والأمر بالسجود على طول في آية أو آيتين ودخلنا لموطن الشاهد على طول مباشرة، هنجِد إن إغواء الشيطان لآيينا آدم في سورة البقرة مقتضب، "فَأَزَلَّهُمَا الشَّيْطَانُ عَنْهَا فَأَخْرَجَهُمَا مِمَّا كَانَا فِيهِ" البقرة: ٣٦، دي في البقرة بس "فَأَخْرَجَهُمَا مِمَّا كَانَا فِيهِ" بس، هنا إزاي ده حصل و قال لهم إيه؟ وكان إيه المدخل، فيه تفاصيل للسقوط وللتوبة أكثر من تفاصيل البقرة، لأن ده مقصد أساسي من مقاصد سورة الأعراف.

توزيع القصص القرآني

توزيع القصص القرآني على كل سور القرآن أمر مُبهر لذلك قبل ما بتيجي تدرس قصة من قصص القرآن تجد إنك تجمع قصص القرآن، هنا "قَالَ مَا مَنَعَكَ أَلَّا تَسْجُدَ إِذْ أَمَرْتُكَ" الأعراف: ١٢، حقيقةً هنا في إشكال لغوي لكن أنا هتجاوزه لأنه مبحث لغوي طويل شوية "زيادة حرف لا" "مَا مَنَعَكَ أَلَّا تَسْجُدَ"، لأن في سورة تانية زي سورة الحجر وص "مَا مَنَعَكَ أَنْ تَسْجُدَ" ص: ٧٥، أصل الكلام فعلاً: ما منعك أن تسجد؟ إزاي "مَا مَنَعَكَ أَلَّا تَسْجُدَ"؟ بعضهم قال: "لا" دي زائدة للتأكيد، وأحياناً: بيستموها صلة غير موصولة؛ موصولة بمعنى الاسم الموصول، إنما صلة أن تأتي أحياناً بمعنى "زائدة" نيجي تقرأ إن الحرف ده صلة كأنه زائد يفيد التأكيد.

وده مبحث طويل أوي: هل في حاجة اسمها حرف زايد في القرآن؟ بعضهم قال لأ، وبعضهم قال زائد نحوًا لكن ليس بلاغةً يعني ملوش إعراب لكن له دلالة لغوية بلاغية معينة ده قصة طويلة، الشاهد إن عشان بعضهم يخرج من الإشكال هنا قال إن لا زائدة.

وبعضهم قال: إن "حملك" هنا يُضَمَّن فعل خفي في داخله هو: ما الذي حَمَلَكَ واضطَّرَكَ لألا تسجد؟ إيه الدافع اللي جَوَّك خَلَاك تمتنع من السجود؟ أكيد في دافع خلاك ترفض، كـل الملائكة "فَسَجَدَ الْمَلَائِكَةُ كُلُّهُمْ أَجْمَعُونَ" ص: ٧٣، أظن دي في ص التأكيد مرتين "كُلُّهُمْ" و "أَجْمَعُونَ"، بعضهم قال: "كُلُّهُمْ" لكي لا يستثني ملكًا و "أَجْمَعُونَ" في نفس الوقت لم يتأخر أحد، في هذا المشهد المَهيب، في هذا التكريم العظيم لماذا ترفض؟ ليه تختار إنك تقف لوحده كده؟ أكيد فيه دافع، "قَالَ مَا مَنَعَكَ أَلَّا تَسْجُدَ إِذْ أَمَرْتُكَ" الأعراف: ١٢،

لماذا رفض إبليس السجود لآدم - عليه السلام -؟

قبل أن نقرأ إجابة إبليس عليه لعنة الله نشوف.

لا ننسى أبدًا هذا التكريم، لا ننسى هذا التكريم لأن كل مرة بيتعد الإنسان عن شرع الله - عز وجل - هو يجحد هذا التكريم، كل مرة الإنسان يلتصق بالأرض وبيتعد عن الوحي هو ينسى هذه اللحظة المهيبة، لما تيجي تشوف المناهج الغربية اللي لا تعترف بالوحي كيف تتعامل مع الإنسان؟ أما يبجوا يجللوه حتى من ناحية علم النفس أو من الناحية البيولوجية يعني حتى من ناحية الخلق يعني هما طبعا مبيعتروش إن في خلق أو جُلُّهم يعني، إن هو مجرد حيوان متطور، مُجَرَّد غرائز تتحرك زي ما بعض علماء النفس عندهم بيقولوا، هو مجرد ذرَّة تافهة غبار كوني، إحنا مجرد غبار كوني تائه يوشك أنه ينقرض.

الفرق تقييم الوحي والنظر إلى الأحجام

شوف هما إزاي بيتعاملوا بعبثية في الحياة، لكن المؤمن يشعر بهذا التكريم، يستحضر حينما يقرأ القرآن أنه موجود في هذه الأرض لغاية عظمى، هما يقولوا إزاي يعني ده الأرض مطلعتش مركز الكون ولا حاجة ساعة ما اكتشف اللي هو كوبرنيكوس ده إن الأرض مش مركز الكون ولا حاجة زي ما كانوا معتقدين قال لك: ده الأرض طلعت ذرة تايهة في الكون وكذلك الإنسان ملوش قيمة والإنسان ملوش مركز، هم نظروا إلى الأحجام لم ينظروا إلى قيمة الوحي كما فعل

إبليس بصّ على قوة النار، يظن إن حينما يحدث صراع النار مع الطين من اللي يكسب؟ هو يقيّمها بمعايير مختلفة، إحنا قلنا جه الميزان ليرجعنا إلى موازين الشرع.

الإنسان نعم ضعيف الإنسان نعم بمنظور الأحجام أشبه بذرة تائهة على ذرة تائهة موجودة وسط مليارات الحجرات، لكن اصطفاه الله، أنزل الله إليه الوحي، أسجد الله لأبيه آدم الملائكة، كلم الله -عز وجل- فرداً منه؛ موسى بل ومحمد -صلى الله عليه وسلم- أي تكريم، فلهذا نزول الوحي لحظات تكريم تجعل الإنسان يعيد النظر إلى نفسه وإلى وظيفته على الأرض، فهنا إبليس يتحرك بنفس المنطلق.

"مَا مَنَعَكَ أَلَّا تَسْجُدَ إِذْ أَمَرْتُكَ" الأعراف: ١٢، أسجد ليه؟ ما قيمته؟ شوف الموازين لما بتختل بعيداً عن الشرع "قَالَ مَا مَنَعَكَ أَلَّا تَسْجُدَ إِذْ أَمَرْتُكَ ۖ قَالَ أَنَا خَيْرٌ مِّنْهُ خَلَقْتَنِي مِن نَّارٍ وَخَلَقْتَهُ مِن طِينٍ" الأعراف: ١٢.

يعترفون بالخلق ومع ذلك يخالفون الأمر

هذه الإجابة الإبليسية اللعينة عليه لعنة الله هنا ربنا -سبحانه وتعالى- يأمره أن يسجد ثم هو يُجَلِّل الأمر، أنا مش شايف إن الأمر ده حكمة، ربنا بيقله: افعل "اسجدوا" الأعراف: ١١، "فَسَجَدَ الْمَلَائِكَةُ" الحجر: ١٣، وهو يقول أنا مش مقتنع، أنا شايف إن الأمر ده فيه مشكلة مش مطبوظ، كيف يسجد النار لطين؟ ويقعدوا يتناقشوا بقي ويعملوا بقي جلسات وهل فعلاً النار أحسن من الطين؟ آه فعلاً، يبقى إحنا محتاجين نردّ الحُكم ده لأن إحنا اكتشفنا إن النار، أيها المخابيل ماذا تفعلون؟ بتعملوا إيه؟ أمر المَلِكُ -سبحانه وتعالى- بهذا، شرع من ربنا -سبحانه وتعالى- وتقعّد تقولي طب استنى كده نشوف الكلام ده ينفع ولا مينفعش؟ ينفع عند مين؟ المَلِكُ يأمر.

"أَنَا خَيْرٌ مِّنْهُ" الأعراف: ١٢، يعني إجابة مستفزة جداً فعلاً، يالحلم المَلِكُ -سبحانه وتعالى- وهو يسأله "قَالَ مَا مَنَعَكَ أَلَّا تَسْجُدَ إِذْ أَمَرْتُكَ" الأعراف: ١٢، "قَالَ أَنَا خَيْرٌ مِّنْهُ"، الأعراف: ١٢، وهذا اللعين يعترف يقول: خلقتني خَلَقْتَنِي مِن نَّارٍ وَخَلَقْتَهُ مِن طِينٍ" الأعراف: ١٢، يعني إنت معملتش حاجة يعني إنت مخلوق ولا ترضى أن تستسلم للأمر، إحنا قلنا دائماً إن "الأعراف" بتربطك إن فيه عند الناس إشكالية بين الخلق والأمر، "أَلَا لَهُ الْخَلْقُ وَالْأَمْرُ" الأعراف: ٥٤، جت في الأعراف، أنّ الذي خَلَقَ هو الذي يأمر.

أنت اعترفت بالخلق، قضية الخلق دي جت في الأنعام، هو هنا إبليس خلاص اعترف بالخلق طب يعترف بالأمر، هنا في إشكالية إن في ناس ممكن تعترف بالخلق زي مشركي مكة وبعض الأقوام لكن لا يعترف بالأمر، يقول لك لأ مفيش رسالة، لا يريد أن يأتمر "قَالَ أَنَا خَيْرٌ مِّنْهُ خَلَقْتَنِي مِن نَّارٍ وَخَلَقْتَهُ مِن طِينٍ"، هنا لذلك تجد آثار كثيرة عند بعض السلف يقولون: "أَوَّلَ مَنْ قَاسَ بِرَأْيِهِ، قِيَاسَ إبليس" عليه لعنة الله، هنا القضية مش إن يكون القياس الفقهي غلط لأ، القاعدة إن: لا قياس مع نصّ، طالما فيه أمر من أوامر الله منقّدهش نتفذلك بقي، نقول طب إحنا نشوف طب نشوف المآلات

طب مش عارف إيه، طالما أمر من ربنا، ممكن نقول إحنا مش قادرين إن مفيش استطاعة إحنا مستضعفين، لكن منردّش الأمر، هذا اللعين ردّ أمر الله - سبحانه وتعالى - **"قَالَ أَنَا خَيْرٌ مِّنْهُ خَلَقْتَنِي مِن نَّارٍ"**.

ومش ردّ الأمر وخلاص، ده ردّه يظهر نوع من الحكمة، ودي إشكالية، يعني لو قال مش عامل مش ساجد، هي كده أنا متكبر، لأ ده بيغطيها بنوع من الأدلة؛ يبشرعنها، بحيث أنه لما يرد الأمر، وهنشوف هو عمل نفس الحركة مع سيدنا آدم مش بيقول له ردّ الأمر وخلاص، مقالوش روح كل وخلاص، لأ خلاه يردّ الأمر بطريقة معينة لأن ده مفاد إبليس أصلاً أن تردّ أمر الله - سبحانه وتعالى - أن تعترض على أمره الشرعي والقدري، لذلك "لو" بتفتح عمل الشيطان ليه؟ لأن هي اعتراض على القدر، فهو الشيطان يريدك أن تقف هذا الموقف؛ الاعتراض، ليس العصيان فقط، يريدك أن تعترض على أمره - سبحانه وتعالى - الشرعي والقدري. فقال **"قَالَ أَنَا خَيْرٌ مِّنْهُ خَلَقْتَنِي مِن نَّارٍ وَخَلَقْتَهُ مِن طِينٍ"**

أيهما أفضل النار أم الطين؟

والعلماء هنا لما اتكلموا بعضهم وده أغلب العلماء من أول الطبري وكثير من المفسرين، قال أصلاً الكلام ده غلط، الطين أفضل من النار وعمله مقارنات طويلة أن الطين هو مكان الإنبات، والطين مكان التواضع، والطين مكان الرزانة، والطين مكان البناء، أما النار هي مكان السرعة الطيش، والإحراق والهدم، أما الطين مكان الرزانة والبناء والإنبات، وإن اللي عايز يبني بيستعمل الطين، اللي عايز زرع بيستعمل الطين، لما بيتحط الطين بيتكوم كده وينخفض فيه نوع من التواضع، فكتير من العلماء قال: أصلاً الكلام اللي قالوا إبليس أصلاً غلط، فهو قال معلومة خاطئة واتفكلم بيها على أنها مسلمة، نوع من الجهل المركب.

بعض العلماء، فريق من العلماء زي ابن عاشور مثلاً، وده كان جرأة منه شوية قال النار هي أفضل أصلاً، وقعد يتكلم ليه النار أفضل وأصل ليه النار أفضل، لكن أفضلية النار لا تقف أمام أمر الله، ليه؟

أولاً: لأنه أمر الله، ثانياً: لأن هذا الطين فيه نفخة من روحه - سبحانه - فهو اجترأ الطين بس، يعني إبليس اجترأ الطين، مقلش خلقته من طين ونفخت فيه من روحك. بعض العلماء قال إحنا لا ندري أيهما أنفع النار أم الطين وده من المتأخرين، وبعضهم قال: لا أصلاً النار والطين محتاجين لبعض، والقضية مش تنافس القضية تكامل، وأن استواء الطين يحتاج إلى النار، وإن ليه تخلي الموضوع تنازع؟ يعني هو لما ربنا قال الملائكة اسجدوا لآدم هل ده معناه أن الملائكة ملهاش أي دور؟ لا **"وَمَا مِنَّا إِلَّا لَهُ مَقَامٌ مَّعْلُومٌ"** الصافات: ١٦٤.

ما أميل له أن أفضلية الطين جاءت من هذه النفخة، لذلك الذي يهتم بطيبته فقط ولا يغدي هذه النفخة هو يخلد إلى الأرض، كما فعل عالم بني إسرائيل اللي في آخر سورة الأعراف، فالشاهد **"قَالَ أَنَا خَيْرٌ مِّنْهُ خَلَقْتَنِي مِن نَّارٍ وَخَلَقْتَهُ مِن طِينٍ"**، فرد أمر الله - عز وجل - بقياس فاسد، وأصل لهذا القياس الفاسد حتى يرفض هذا السجود، طبعاً كلمة أنا خير

منه مفتاح كل شر و-العياذ بالله-، الكلمة دي لما بتسيطر على إنسان بتخليه يرفض حاجات كتير جدًّا، في حين أن لازم يبقى فيه قائد، لازم يبقى فيه إمام، فلو كل واحد رفض وقال: أنا خير منه يفسد الصف تمامًا، "فَلَا تُرْكُوا أَنْفُسَكُمْ" النجم: ٣٢.

خطورة التكبر

أنا خير منه دي ما سلطت على عملٍ إلا وأفسدته، أي مجموعة شغل، عمل دعوي، حركي، ما سلطت هذه الكلمة على قلوبهم وعقولهم إلا وأفسدتهم، ما انتشرت بينهم على ألسنتهم، أنا عملت، لا أنا اللي عملت، إلا كانت إيذانًا ببداية الخراب، نعوذ بالله من ذلك، لذلك أول لما نسمعها تنتشر لابد من قصمها مباشرةً يعني أرجعها، لابد أن نرفضها، خلاص الكلمة دي ننساها، محدش يقول بس أنا اللي عملت، بس أنا اللي عملت، طب لا أنت ولا هو، يتشال العمل ويبوظ العمل.

لو قعدنا نحكي قصص الأعمال اللي باظت بسبب الكلمة دي هنقفل التصوير وهنقعد نحكي قصص كتير، هذه الكلمة ما دبت في مكانٍ إلا وحولته من جنةٍ إلى الخروج من هذه الجنة، كما حدث مع إبليس، لما تكلم بهذه الكلمة أمر بالخروج منها، "قَالَ فَاهْبِطْ مِنْهَا" الأعراف: ١٣، هذه المنزلة لأن كلمة منها الهاء دي، يُحتمل أن تعود على المنزلة مش بس الجنة، الله -عز وجل- يرفع الناس ويضعهم في منزلة، حينما يتكلمون بهذا الكلام يُخفضون و-العياذ بالله-، يأتيهم أمر اهبطوا، لستم أهلاً للرفعة، أنا رفعتكم فلا تنسبوا ذلك إلى أنفسكم، متقولش أنا، أنا أصلًا، أنا من نار، إزاي وأنا مينفعش.

الله -عز وجل- يحب، الواحد للاسف بينخاف يقول الكلام ده لأن عنده قصور في مثل هذه القضية، الله يحب الهين اللين، السهل القريب الذي هو مفاتيح للخير، يكون من مفاتيح الخير، ولا يكون من مفاتيح الشر، فهذه الكلمة ما دخلت في مكانٍ إلا وأخرجتهم من الجنة التي كانوا فيها، ما ابتلوا قوم بهذه الكلمة إلا وأفسدت عليهم أعمالهم.

"قَالَ أَنَا خَيْرٌ مِّنْهُ خَلَقْتَنِي مِن نَّارٍ وَخَلَقْتَهُ مِن طِينٍ"، مباشرةً بعدها، "قَالَ فَاهْبِطْ مِنْهَا"، هذا مرض عصي، تمكّن الكبر لا يصلح معه نقاش، هذا المرض حينما يتمكن، القضية مش قضية اقناع ده كبر مسيطر على القلوب خلاص، هذا المرض حينما يتمكن من الإنسان و-العياذ بالله- يمنعه من الخير "قَالَ فَاهْبِطْ مِنْهَا"، بعضهم قال أن الفاء دي فاء السببية، أي بسبب أنك تكبرت، وطبعًا لا يدخل الجنة من كان في قلبه مثقال ذرة من كبر حتى لا يتشبهه بإبليس، وتطبيقًا لموعود الله. "فَاهْبِطْ مِنْهَا فَمَا يَكُونُ لَكَ أَنْ تَتَكَبَّرَ فِيهَا" الأعراف: ١٣، مينفعش، لا يكون لك أن تتكبر فيها أي في هذه المنزلة، في هذه المنزلة التي رفعتك إليها لا يصلح معها تكبر، كم من إنسان سقط من منزلةٍ رفعه الله -عز وجل- فيها بسبب هذه الكلمة، كم إنسان رفعه الله -عز وجل- واستعمله في الطاعة ثم بكبره سقط من هذه المنزلة، رفعه الله -عز وجل-، كان لا شيء "لَمْ يَكُنْ شَيْئًا مَّذْكُورًا" الإنسان: ١، أي الله -عز وجل- به ورفعته ثم هو يقول أنا

فعلت وأنا فعلت، مباشرة "فَاهِبُطُ مِنْهَا فَمَا يَكُونُ لَكَ أَنْ تَتَكَبَّرَ فِيهَا"، فليكثر الإنسان من قول فعل الله، وأعطى الله، وأنعم الله، ولا يكثر من قول لقد فعلت ولقد أدبت، ولقد سويت، يكثر من ذكر نعم الله عليه، ولا يكثر من مدح أفعاله.

"فَاهِبُطُ مِنْهَا فَمَا يَكُونُ لَكَ أَنْ تَتَكَبَّرَ فِيهَا فَخُرْجُ إِنَّكَ مِنَ الصَّاغِرِينَ"، العلماء اتكلموا إزاي لما إبليس أمر بالخروج من الجنة عاد مرة أخرى لوسوسة آدم، ده حقيقة هو أمر غيبي نكتفي فيه بالتسليم، حتى لا نخوض في قضايا، وإن كنت هاذكر لكم سريعًا بعض ما قال أهل العلم.

بعض المفسرين حاول يخرج من الأزمة دي وقال: أن الجنة دي أصلًا كانت على الأرض وليست جنة السماء ليست جنة الخلد.

لكن حقيقة قول جماهير أهل السنة أن هذه الجنة هي جنة الخلد، هي جنة النعيم، ونقاش طويل ليه مش جنة النعيم وإزاي يبقى فيها اختبار والجنة مفيش فيها اختبار، الشاهد نحن نتعامل مع ما آتانا من آيات الله - سبحانه وتعالى -.

خلينا نتعامل مع القرآن أنه كتاب هدى، وقضية أن القرآن كتاب هدى قضية مرجحة لكثير من الخلافات، وقضية تبعذك عن كثير من النقاشات، احنا بنستفيد أن ربنا - سبحانه وتعالى - أخبرنا أنه خلق آدم في الجنة، خلاص ربنا خلق آدم في الجنة، نبحت ونتدبر فيما أخبرنا الله به، قال: "فَاخْرُجْ إِنَّكَ مِنَ الصَّاغِرِينَ".

هل إبليس كان مخبرًا؟

قال ربنا - سبحانه وتعالى - مخاطبًا إبليس عليه لعنة الله، "قَالَ فَاهِبُطُ مِنْهَا فَمَا يَكُونُ لَكَ أَنْ تَتَكَبَّرَ فِيهَا فَخُرْجُ إِنَّكَ مِنَ الصَّاغِرِينَ"، العلماء لما جم اتكلموا على مسألة فاخرج إنك من الصاغرين فكلمة "إِنَّكَ مِنَ الصَّاغِرِينَ"، هل إبليس عليه لعنة الله كان هو كُتِبَ عليه، طُبع على الشر من أول ما خُلِقَ، ولا هو زي الإنسان اختار؟ كان عنده قدرة يختار وده كلام ابن عاشور وكثير من المفسرين، إن كان له قدرة أن الله - عز وجل - أعطاه الله - عز وجل - إن هو يطيع أو يعصي، فلما عصى في هذه اللحظة كُتِبَ عليه الشقاء الأبدي، فقالوا هنا "إِنَّكَ مِنَ الصَّاغِرِينَ"، بتعبير حتى ابن عاشور المسخ النفساني، مُسخت نفسه في هذه اللحظة، فلا عودة.

عشان بعض الناس يقول لك إيه طب ما هو ربنا من الأول، ويقعدوا يجيبوا شبهات، وربنا من الأول خلى إبليس كده، هو طبعا دي مسألة في القدر، نعم الله - عز وجل - هو الذي يُضِلُّ الإنسان لكن يضلّه بحكمته - سبحانه وتعالى -، بعلمه، أنه يستحق ذلك، ويستحق الإضلال، مش هنعمل زي المعتزلة نقول لا ربنا مبيضلش، هو الإنسان اللي بيختار الضلال بنفسه، هو اللي بيخلق الضلال، لا، الله - عز وجل - هو الذي جعل الظلمات والنور - سبحانه وتعالى -، فهنا إبليس في هذه اللحظة لما أبى السجود صدر الأمر من الملك - سبحانه وتعالى - قال "إِنَّكَ مِنَ الصَّاغِرِينَ".

الصَّاعِرِينَ، ستظل ذليلاً أبد الدهر، خلاص، اتقبل عنده باب العودة هنا قالوا سُمي إبليس من الإبلان أي اليأس، مبلسين أي يائسين محبتين - سورة الروم.

فهنا الإبلان من اليأس قال **"إِنَّكَ مِنَ الصَّاعِرِينَ"**، قالوا في هذه اللحظة كما أن الله - عز وجل - إذا مسخ قومًا في أبدانهم لن يعودوا، فكذلك هذا مُسَخ في نفسه والعياذ بالله، ده من العقوبات الأبدية نسأل الله السلامة، كما أخبر ربنا **"فَأَعْقَبَهُمْ نِفَاقًا فِي قُلُوبِهِمْ إِلَى يَوْمِ يَلْقَوْنَهُ"** التوبة: ٧٧، فيه عقوبات كده والعياذ بالله، **"فَأَعْقَبَهُمْ نِفَاقًا فِي قُلُوبِهِمْ إِلَى يَوْمِ يَلْقَوْنَهُ"**، فهنا قال ربنا لإبليس **"فَأَخْرَجَ إِنْكَ مِنَ الصَّاعِرِينَ"**، الصاعرين عكس أنا خير منه، متكبر، فعوقب بنقيض قصده، مرضاش يسجد حتى لا يكون هذا عمل فيه إهانة له كما يظن، كما يدعي، فعوقب بنقيض قصده، أراد أن يرتفع فكانت عقوبته والعياذ بالله أنه من الصاعرين.

لماذا طلب الله من إبليس أن يُنظره

" قَالَ أَنْظِرْنِي إِلَى يَوْمِ يُبْعَثُونَ" الأعراف: ١٤، لم يقل **"رَبَّنَا ظَلَمْنَا أَنْفُسَنَا"** الأعراف: ٢٣، كما قال آدم، طلب طلب قال في آية ربي، هنا **" قَالَ أَنْظِرْنِي إِلَى يَوْمِ يُبْعَثُونَ"**، طلب الإنظار أن يُنظر إلي يوم البعث، ليه إبليس طلب أن يُنظر إلي يوم البعث؟ عشان مفيش متعة في الدنيا إلا ويتمتع بيها؟ عشان مفيش ولا واحد من البشر يفلت منه، شوف اتعلم علو الهمة من إبليس، شوف، يعني **علو الهمة من إبليس عايز مفوتوش ولا واحد من أولاد آدم من بني آدم**، لذلك الخطاب في الأعراف أربع مرات السورة الوحيدة، يا بني آدم، احذروا، تذكروا دائمًا هذه المعركة.

هنا قال **" قَالَ أَنْظِرْنِي إِلَى يَوْمِ يُبْعَثُونَ"**، هو مركز مع بني آدم، يوم ما بيعتهم، عايز أفضل معاهم مسيهمش لحظة لغاية لما أطمئن أن البعث جه، خلاص يخشوا النار معايا أنا كده اطمنت، **"وَقَالَ الشَّيْطَانُ لَمَّا قُضِيَ الْأَمْرُ" إبراهيم: ٢٢**، عشان أخطب فيهم الخطبة بتاعتي، عايز أعداد، الشيطان ميحبش يخطب في مسجد صغير، عايز أعداد كبيرة، **"إِنَّ اللَّهَ وَعَدَكُمْ وَعْدَ الْحَقِّ"**، عشان يخطب فيهم كلهم في النار، فهو عايز إيه؟ كل الناس تبقى معاه **"أَنْظِرْنِي إِلَى يَوْمِ يُبْعَثُونَ" * قَالَ إِنَّكَ مِنَ الْمُنظَرِينَ** الأعراف ١٤: ١٥.

كثير من العلماء حتى ذكر الإمام ابن كثير فأجاب الله اللعين إلى ما سأل، كثير من العلماء يقول إيه، إن إبليس لما طلب أعطاه الله سؤاله، لكن المتقدمين الإمام الطبري، وقبله الإمام السُدِّي، وبعض السلف قال لا، لم يعطه الله سؤاله، أمال إيه اللي حصل؟ هو طلب أن يُنظر إلي يوم البعث، يوم البعث ده يعني الناس كلها بتموت في النفخة الأولى وبعدين يفضلوا فترة، وبعدين النفخة الثانية يوم البعث وبعد كده مفيش موت، يُدحر الموت ويُنحر الموت بعدها، إبليس عايز يفضل لا يذوق الموت، إبليس لما طلب أنظرنني إلي يوم يُبعثون كان عايز حاجتين: لا يريد أن يذوق الموت يريد الخلود، ولا يريد أن يفلت منه أحد من بني آدم.

فخذ الأولى أن هتفضل مع الناس لغاية النفخ، لكن هتموت معاهم ستذوق الموت، لذلك لما ربنا قال له في سورة أخرى **"قَالَ فَإِنَّكَ مِنَ الْمُنْظَرِينَ * إِلَى يَوْمِ الْوَقْتِ الْمَعْلُومِ"** الحجر ٣٧: ٣٨، ماقلوش إلي يوم يُبعثون، قالوا الوقت المعلوم هو يوم النفخة لما الناس كلها بتموت، وده مروى عن السُّدِّي وبعضهم رواه عن ابن عباس زي ابن أبي حاتم، وغيره وده اختيار الطبري، أن الله -عز وجل- لم يعطه سؤاله، إن اللعين كان يريد أن لا يذوق الموت، قضية الخلود وأنه لا يريد أن يذوق الموت قضية شغلاه، بل هو دخل منها لآدم أصلاً **"هَلْ أَذُكَ عَلَى شَجَرَةِ الْخُلْدِ"** طه: ١٢٠، فهو لما أراد أن يطلب هذا الطلب قال أنظري إلي يوم يبعثون، لما أعطاه الله -عز وجل- قال **"فَإِنَّكَ مِنَ الْمُنْظَرِينَ * إِلَى يَوْمِ الْوَقْتِ الْمَعْلُومِ"**، احنا قلنا الآيات اللي بتيجي مطلقه في موطن بثقيده في موطن آخر في القرآن، فأظن آية الحجر قيدت هذا الموطن **"إِلَى يَوْمِ الْوَقْتِ الْمَعْلُومِ"**، أي إلي يوم النفخة لا إلي يوم البعث.

الفرق بين آدم وإبليس عند الوقوع في المعصية

"إِنَّكَ مِنَ الْمُنْظَرِينَ"، قال لما اطمئن وخذ الوعد من ربنا، ويعلم أن الله -عز وجل- إذا أعطى وعدًا -سبحانه وتعالى- أمضاه لما اطمئن **"قَالَ فَبِمَا أَغْوَيْتَنِي لَأَقْعُدَنَّ لَهُمْ صِرَاطَكَ الْمُسْتَقِيمَ * ثُمَّ لَآتِيَنَّهُمْ مِّنْ بَيْنِ أَيْدِيهِمْ وَمِنْ خَلْفِهِمْ وَعَنْ أَيْمَانِهِمْ وَعَنْ شَمَائِلِهِمْ ۗ وَلَا تَجِدُ أَكْثَرَهُمْ شَاكِرِينَ"** الأعراف ١٦: ١٧، سيدنا آدم لما أذنب قال **"رَبَّنَا ظَلَمْنَا أَنفُسَنَا"**، قال أنا اللي غلطان، إبليس لما أذنب قال يارب أنت اللي أغويتني، ده الفارق، راجع نفسك لما بتغلط، أنا اعمل أنا إيه يعني، أعمل أنا إيه يعني ما هو ده اللي حصل، ما هو الوضع كده أعمل أنا إيه أنا مش غلطان، يعني فيه واحد لما يجي يذنب تيجي تقول له طب توب إلى الله، أعمل إيه ما الشهوات في كل حته ملاك أنا يعني، واحد يقول لك أنا ظلمت نفسي، أنا قصرت.

فهذه النزعة الشيطانية لا بد أن يتخلص منها الإنسان، اللي دائماً يعود باللوم على ربه في القدر وفي الشرع، لما ييجي يخطئ خطأ شرعي يعود باللوم على ربنا، ما هي الظروف أصلاً وأنا اعمل إيه يعني، لما يحصل قدر، ليه يارب كده، يعود باللوم على ربه، لذلك سيدنا يونس -عليه السلام- وهو نبى ويعمل في الدعوة ماسبش البلد عشان عقد عمل مثلاً، ده راح يدعو إلى الله في بلد تانية، ثم يلتقمه الحوت ويقول **"لَا إِلَهَ إِلَّا أَنْتَ سُبْحَانَكَ إِنِّي كُنْتُ مِنَ الظَّالِمِينَ"** الأنبياء: ٨٧، ينزه الله، ويقول أنا اللي غلطان، هذه الكلمة كلمة تُحفظ، حتى إذا مررت بمثل هذه الأزمات وأتاك الشيطان فلتلجأ إلى الله بها وتقول **"لَا إِلَهَ إِلَّا أَنْتَ سُبْحَانَكَ إِنِّي كُنْتُ مِنَ الظَّالِمِينَ"**.

فالشيطان **"قَالَ فَبِمَا أَغْوَيْتَنِي"**، أنت اللي ضلتي أنا كنت كويس أصلاً، يعني أنا أصلاً كويس، **"فَبِمَا أَغْوَيْتَنِي"**، لذلك بعضهم قال الباء هنا، فيه مفسرين قال الباء باء المجازة، دي قصاد دي، مش أنت ضلتي طب شوف أنا هعمل فيهم إيه، كيف يتكلم مع ربه؟ بعضهم قال هذه باء القسم، اللعين يقسم بربه والله وبالله لأغويهم، سواء باء السبب أو باء القسم تدل على شدة غيظه من آدم وبنيه، قال **"فَبِمَا أَغْوَيْتَنِي"** نعم الله -عز وجل- يضل، لكنه يستحق ذلك.

الغواية: الانصراف عن الطريق الصحيح، بعضهم قال أن الفصيل اللي هو ابن الناقة لما يشرب لبن كثير، أو يُمنع عن اللبن تمامًا فينزل في الحالتين لما يموت بسبب قلة اللبن تمامًا أو شرب لبن كثير يقولوا هوى الفصيل، مات بسبب اللبن، بسبب لبن فاسد أو لبن كثير، أو تعامل خاطيء مع اللبن، يقولوا هوى الفصيل، الامتلاء إلى حد الموت ده غواية، فالامتلاء من الدنيا أو من الكبر إلى حد الضلال ده غواية.

رد الشيطان وترصده لبني آدم

قال **"فَبِمَا أَغْوَيْنِي"**، طب هيعمل إيه؟ هو عايز يرد، أبي أن يسجد، قال **"لَأَقْعُدَنَّ لَهُمْ صِرَاطَكَ الْمُسْتَقِيمَ * ثُمَّ لَا تَجِدَهُمْ مِّنْ بَنِي آيْدِيهِمْ وَمِنْ خَلْفِهِمْ وَعَنْ أَيْمَانِهِمْ وَعَنْ شَمَائِلِهِمْ ۗ وَلَا تَجِدُ أَكْثَرَهُمْ شَاكِرِينَ"** الأعراف: ١٦ : ١٧، إبليس قال **"لَأَقْعُدَنَّ"**، إبليس لما أرد إن هو يقف في طريق بني آدم مقلش لأقفن، ماشي، ومقلش لأنامن، العرب إمتى بتستخدم كلمة القعود؟ يقول لما أنت تحب تترصد لواحد وتريد أن تقعد لتحفظ قواك ولا تريد أن تنام لتستعد متأهبًا، فيبختار لفظ القعود لواحد يبختار أنه يفضل في مكان مورهوش حاجة غير حاجة واحدة بس، **"وَأَفْعُدُوا لَهُمْ كُلَّ مَرْصَدٍ ۗ"** التوبة: ٥، احنا مورناش حاجة غير مقاطعة أهل الباطل.

فالشيطان بيقول **"لَأَقْعُدَنَّ"**، موراييش غيركم، أنا قاعد لهم، فالشيطان بيقول إيه؟ **"لَأَقْعُدَنَّ لَهُمْ صِرَاطَكَ الْمُسْتَقِيمَ"**، الشيطان قرر أنه يقعد، القعود فيه طول الفترة، وفيه التأهب، العرب يستعملون القعود عشان يجمع بين حاجتين، إنه عايز يحافظ على قوته عشان يفضل أطول فترة ممكنة، وفي نفس الوقت يظل متأهبًا، فيستعملوا لفظة القعود للي قاعد مورهوش حاجة، أنا قاعد هنا موراييش حاجة، **"فَاذْهَبْ أَنْتَ وَرَبُّكَ فَقَاتِلَا إِنَّا هَاهُنَا قَاعِدُونَ"** المائدة: ٢٤، احنا مش هنتقل من هنا، **فالتعبير عن الملازمة بيأتي بالقعود**، قال له أنا ملازم، أنا مش هروح مثلاً هعمل مشوار وارجع، أنا قاعد.

ولما اختار إبليس اللعين أن يجلس على الصراط، مقعدش مثلاً وكل ما يجي حد على الصراط يبقى يجي، لا، عارف اللي واقف على باب المسجد، مش مثلاً يروح ولما يشوف حد جي ابقى نادي عليا، لا، وده من علو همته، إحنا قلنا الشيطان علو همة، إنه طلب أنه يُنظر إلي يوم البعث، إن لما حب يقعد قعد على الصراط مش بعيد، أنه اختار القعود عشان طول الفترة، أيضًا في الحديث النبي -صلى الله عليه وسلم- **"ما من مولود يولد إلا وينحسه الشيطان"**،^٣ يعني بيبدأ مش معاك مثلاً لمرحلة البلوغ، يعني الشيطان مش بيسيبك مثلاً لغاية ما يبقى عندك ١٢، ١٣ سنة وبعدين يلا أما نشوف بقي، لا، **"ما من مولود يولد"**، شوف علو الهمة.

من أول لحظة الولادة، وعايز كل البشر، ومش مثلاً يبختار أنه يبعثك عن طاعة واحدة، لا قال -صلى الله عليه وسلم- **"إن الشيطان قعد"**، نفس التعبير، **"قعد لابن آدم بأطرقه كلها"**، أي طاعة أنت عايز تعملها الشيطان قاعد

^٣ "ما من بني آدم مولودٌ إلا يمسه الشيطان حين يُؤلِّدُ، فيستهلُّ صارخًا من مسِّ الشيطان، غيرَ مريمَ و ابنها" صححه الألباني.

لك، فقال -صلى الله عليه وسلم-، "أراد أن يُسلم فاتاه الشيطان، فقال أتريد أن تُسلم وتذر دينك ودين آبائك فعصاه فأسلم، فأراد أن يهاجر قال أهاجر وتذر أرضك وسمائك، فعصاه فهاجر، فأراد أن يجاهد فقال أتجاهد وتترك الأولاد، والزوجة تُنكح الزوجة ويُتيم الأولاد، ويقسم المال، فعصاه فجاهد"؛ كل اختيار بتخاره في الطريق يأتيك الشيطان، كل اختيار.

لذلك بعضهم قال هنا الصراط المستقيم، بعضهم قال المقصود به الهجرة، وإن ده كانت فيه إشارة أن في هجرة ممكن تحدث، وأن الشيطان يريد أن يثبطكم عنها، بعضهم قال الصراط المستقيم القرآن، وبعضهم قال الإسلام وهو أعم من ذلك، كل شيء يرضي الله -سبحانه وتعالى- هو من صراطه المستقيم، وعلم الشيطان أن الله صراطاً مستقيماً ليس أعوج، علم الشيطان أن صراط الله -عز وجل- مستقيماً، فيقول له صراطك المستقيم، فيقول له أنا لما أجي أقعد هقعد على المستقيم بحيث أنه إيه، أي حد يريد أن يصل إلى الله هو يقطع عليه الطريق، فهو يعمل قاطع طريق.

فحينما يريد السالك إلى الله -عز وجل- أن يسير ولا يتذكر قضية الشيطان ولا يتخذ عدو، هو يسير في غير الطريق، ربنا يقول لك أن الشيطان قاعد لك على الصراط المستقيم، "لَأَقْعُدَنَّ لَهُمْ"، لام الخاص أنا مواريش غيرهم، "لَأَقْعُدَنَّ لَهُمْ صِرَاطَكَ"، أنا بقول لك لام دي لام الملكية، أنا قاعد لهم مواريش غيرهم، "صِرَاطَكَ الْمُسْتَقِيمَ * ثُمَّ"، مش بس هفضل قاعد، يعني مش مثلاً هفضل قاعد واللي يعدي أشنكله وخلص، لا، قاعد إيه وبيخطط وبيفكر، "ثُمَّ لَا تَبِيْنُهُمْ مِّنْ بَيْنِ أَيْدِيهِمْ وَمِنْ خَلْفِهِمْ وَعَنْ أَيْمَانِهِمْ وَعَنْ شَمَائِلِهِمْ"، شوف التفكير، يعني مش بس قاعد وخلص، وكل ما يجي حد يدخل الطريق المستقيم يقول له ليه، لا قاعد يفكر، ويجرب كل المداخل.

بعضهم العلماء قال: المقصود من أمامهم ومن خلفهم وعن أيماهم وعن شمائلهم، إن كل لفظة من دي ليها دلالة، وده مروى عن ابن عباس، فبعضهم قال أن الأمام أي من الآخرة، ومن الخلف أي من الدنيا، وعن اليمين أي الطاعات، والشمال أو الشمائل أي السيئات، فقالوا أن يأتيهم من أمامهم يخوفه، يخوفه أنت رايح فين أنت مجنون حد يعمل كذا، حد يتعلم، حد يدعو، حد يجاهد، أنت رايح فين، يخوفه من السير في طريق الآخرة، ويأتيه من خلفه أنت سايب إيه بس تعالى، حد يسبب الشغلانة دي، وحد يسبب، أنت ليه هتسيب الدنيا هتسيبها لمن يعني، ولو أنت محدتش الدنيا مين اللي ياخذها يعني، مين يعني، لو أنت محدتش هتسيبها لمن، ده ميستهلش حاجة، أنت تستاهل كل خير، فيجيبك من خلفهم رايح فين مثلاً.

وعن أيماهم، يجيبك كل ما تيجي تعمل طاعة، إيه ده صعبة جداً، هو ده دين ده، مش ممكن حد بيعمل اللي انت بتعمله ده، ده سفه، ده ميرضيش ربنا، يجيبك عن الشمائل، يقول لك: الله شوف الجمال، يزين لك المعصية، يزينها

٤ "إِنَّ الشَّيْطَانَ قَعْدٌ لِّأَدَمَ بِأَطْرَفَيْهِ، فَعَعْدَهُ لُهُ بِطَرِيقِ الْإِسْلَامِ، فَقَالَ: تُسَلِّمُ وَتَذَرُ دِينَكَ وَدِينَ آبَائِكَ وَأَبَاءِ أَيْبِكَ، فَعَصَاهُ فَأَسْلَمَ، ثُمَّ قَعَدَ لَهُ بِطَرِيقِ الْهَجْرَةِ، فَقَالَ: تُهَاجِرُ وَتَدَعُ أَرْضَكَ وَسَمَاءَكَ، وَإِنَّمَا مِثْلُ الْمُهَاجِرِ كَمِثْلِ الْفَرَسِ فِي الطَّوْلِ، فَعَصَاهُ فَهَاجَرَ، ثُمَّ قَعَدَ لَهُ بِطَرِيقِ الْجِهَادِ، فَقَالَ: تُجَاهِدُ فَهَوَّ جَهْدُ النَّفْسِ وَالْمَالِ، فَتَقَاتَلَ، فَتَقَاتَلَ، فَتَنَكَّحُ الْمَرْأَةَ، وَيُقَسِّمُ الْمَالَ، فَعَصَاهُ فَجَاهَدَ، فَقَالَ رَسُولُ اللَّهِ: فَمَنْ فَعَلَ ذَلِكَ كَانَ حَقًّا عَلَى اللَّهِ عَزَّ وَجَلَّ أَنْ يُدْخِلَهُ الْجَنَّةَ، وَمَنْ قَبِلَ كَانَ حَقًّا عَلَى اللَّهِ عَزَّ وَجَلَّ أَنْ يُدْخِلَهُ الْجَنَّةَ، وَإِنْ غَرِقَ كَانَ حَقًّا عَلَى اللَّهِ أَنْ يُدْخِلَهُ الْجَنَّةَ، أَوْ وَقَصَتْهُ دَائِبَةٌ كَانَ حَقًّا عَلَى اللَّهِ أَنْ يُدْخِلَهُ الْجَنَّةَ" صححه الألباني.

لك، زي ما شوف الشيطان كيف سول وزين الشجرة لأبينا آدم، لازم يزبن لك، يعني الشيطان مبيقولكش إيه إعمل المعصية الوحشة دي وخلص اعملها، لا، لازم يزبنها لك، يخليها إيه جميلة في عينك، يخليها أمينتك قبل أن يأمرك بالمعصية، فيأتيته من أمامه ومن خلفه.

وبعضهم عكس، قال الأمام هي الدنيا، والخلف هي الآخرة، أيًا كان، بعضهم قال، لا مش كل لفظ له دلالة ولا حاجة، إنما ده دلائل المقصود هنا إن كما أن العدو يبحث عن أي مدخل يدخل إلى الذي يريد أن يفتسه، يبحث عن أي مدخل، وهنا القضية الإحاطة كما قال ربنا - سبحانه وتعالى - "وَأُحِيطَ بِثَمَرِهِ" الكهف: ٤٢، فلما أحيط بثمره لم يجد منفذًا للهروب، فالشيطان عايز يعمل دايرة عليك، زي ما آخر السورة أيضًا هنا "إِنَّ الَّذِينَ اتَّقَوْا إِذَا مَسَّهُمْ طَائِفٌ" الأعراف: ٢٠١، طائف يعني بيلف يدور، يفضل يطوف، الشيطان قبل ما بيختار السهم اللي يرميه في قلبك بيعد فترة يطوف حواليك، مش بيبعدك ولا حاجة، ده بيعد يطوف يدرسك.

نفس الوصف "إِنَّ الَّذِينَ اتَّقَوْا إِذَا مَسَّهُمْ طَائِفٌ" الأعراف: ٢٠١، نفس الوصف اللي قاله النبي -صلى الله عليه وسلم- "لما صور الله -عز وجل- آدم جعل إبليس يطيف به"، ده، ده بتاع فلوس، لا ده بتاع نساء، لا ده بتاع كبر، ده نخشله من المدخل ده، وبعدين بيحرب قدام ورا، يمين، بس لقيت المدخل، هو عايز يعمل إحاطة متفلتش، زي خيوط العنكبوت يقعد يلف يلف الخيوط عليك حتى تسقط، الشيطان واخذ الموضوع معركة، الشيطان مش واخذ الموضوع لعبة، لأن ده مستقبله انتهى، مستقبله الأخرى انتهى، فهو لا يفكر إلا فيك، هو الموضوع عنده خالص، يعني مش قاعد مثلاً يفكر طب بيجاهد نفسه عشان يصلي ركعتين، هو مورهوش غيرك خلاص، خد الإنذار إلي يوم النفخة الأولى.

العجيب هنا اللعين بيقول إيه لربنا، "وَلَا تَجِدُ أَكْثَرَهُمْ شَاكِرِينَ" الأعراف: ١٧، فالعلماء بيقولوا شاكرين إيه بالضبط، إيه النعمة اللي هنا إبليس بيقول ربنا هما مش هيشكروها؟ الطبري هنا اختار معنى رائع بصراحة، إيه النعمة اللي الشيطان، هل المقصود، دايماً، أحياناً عندنا قواعد في اللغة والتفسير أن لما يجي مفعول محذوف يعني هنا ربنا مقلش شكروا نعمة إيه فممكن يفيد العموم، فبضعهم قال أي لا يشكرون أعظم النعم أو معظم النعم، أو أغلب النعم، الطبري هنا اختار نعمة معينة، "قال: لا يشكرون إسجاد الملائكة الذي بسببه أنا طردت"، قال مش أنت خلقت الملائكة يسجدوا، النعمة دي اللي أنا اطردت بسببها هما مش هيحترمونها ولا يعرفوا قيمتها، لكن أنا هجاهد عشان أستردّها، شوف اللعين.

بعضهم قال أن الآية دي وغيرها هي دي تفسير قول الله - سبحانه وتعالى - في سورة سبأ، "وَلَقَدْ صَدَقَ عَلَيْهِمْ إِبْلِيسُ ظَنَّهُ" سبأ: ٢٠، يعني إبليس ظن ظن معين، إن فيه ناس هتمشي وراه، إبليس ظن هذا الظن، وأعلن هذا الظن أمام الرب - سبحانه وتعالى -، قال يارب فيه ناس هتسمع كلامي أنا، فقالوا من أطاع الشيطان فقد صدق ظن إبليس فيه،

° لَمَّا صَوَّرَ اللَّهُ آدَمَ فِي الْجَنَّةِ تَرَكَهُ مَا شَاءَ اللَّهُ أَنْ يَتَّكِفَهُ، فَجَعَلَ إِبْلِيسَ يُطِيفُ بِهِ، يُنْظَرُ مَا هُوَ، فَلَمَّا رَأَى أَجُوفَ عَرَفَ أَنَّهُ لِحِقِ خَلْقًا لَا يَتَمَالَكُ" صحيح مسلم

فلذلك حتى الطبري يقول "فهنيئاً لمن خيب ظن اللعين فيه"، الواحد ممكن ياخذ نية أنه يجيب ظن اللعين، لن أكون من أتباع إبليس.

"وَلَا تَجِدُ أَكْثَرَهُمْ شَاكِرِينَ"، فكانت العقوبة قال تأكيد "قَالَ اخْرُجْ مِنْهَا مَذْهُورًا وَمَا مَدْحُورًا" الأعراف: ١٨، بلا عودة، الدأمة شدة الذم والعيب، مدحوراً مطروداً لعيباً لا عودة لك، مش أنت بتقول أن فيه ناس هتسمع كلامك، الله غني عن العالمين، "لَمَنْ تَبِعَكَ مِنْهُمْ لَأَمْلَأَنَّ جَهَنَّمَ مِنْكُمْ أَجْمَعِينَ"، وقيل اللام هذه لام القسم، وقيل لام الابتداء، لمن تبعك، أي والله يقسم الله بنفسه - سبحانه وتعالى - كل من تبعك منهم، "لَأَمْلَأَنَّ جَهَنَّمَ مِنْكُمْ أَجْمَعِينَ"، و-العياذ بالله-. فالله -عز وجل- لا يعجزه أحد - سبحانه وتعالى -، العاصي، المتكبر الذي أعرض عن وحيه وشرعه، الله -عز وجل- يلقيه في جهنم ولا يبالي - سبحانه وتعالى -، فليس أحد بعزيز على الرب - سبحانه وتعالى -.

الله -عز وجل- يمهّل ويرسل الرسل ويعطي الإنذار، ثم إن أعرض الإنسان وتكبر واستمر في إعراضه وتكبره يعذبه الله -عز وجل-، - سبحانه وتعالى -،

اسأل الله -عز وجل- أن يستعملنا لنصرة دينه وأن لا يستبدلنا، أسأل الله -عز وجل- أن يجعلنا من الطائعين المعادين لإبليس، المعادين لجنده، المعادين لذريته، اللهم ربنا آتنا في الدنيا حسنة وفي الآخرة حسنة وقنا عذاب النار، أقول قولي هذا وأستغفر الله لي ولكم، سبحانك اللهم وبحمدك أشهد أن لا إله إلا أنت أستغفرك وأتوب إليك.

تم بحمد الله

شاهدوا الدرس للنشر على النت في قسم تفرغ الدروس في منتديات الطريق إلى الله وتفضلوا هنا:

<http://forums.way2allah.com/forumdisplay.php?f=36>